

TUS KHETOS UAS MUAJ TXOJ SIA NYOB

COV THWJ TIM TEJ LUS TIM KHAWV

YEXUS KHETOS LUB KOOM TXOOS NTAWM TSOOM HAIV NEEG NTSEEG HAUV HNUB NYOOG KAWG

Thaum peb nco txog Yexus Khetos txoj kev yug los hauv ntiaj teb uas tau muaj ob txhiab xyoos tas los lawm, peb hais peb tej lus tim khawv txog Nws lub neej uas zoo tshaj plaws thiab txog Nws txoj kev theej txhoj uas muaj hwj chim tsis txawj kawg. Tsis tau muaj leej twg uas tau pab cov neeg uas nyob hauv ntiaj teb no npaum li Nws tau pab.

Nws yog tus Yehauvas Zoo Kawg Nkaus hauv Phau Qub, tus Mexiyas hauv Phau Tshiab. Nws yog tus tsim lub ntiaj teb no los ntawm Nws Leej Txiv txoj kev txib. “Vajtsvw kom nws tsim ib puas tsav yam huv tib si. Ib puas tsav yam ntawd, tsis muaj ib yam twg uas tsis yog nws tsim” (Yauhas 1:3). Txawm yog Nws tsis muaj txim txhaum hlo li, Nws tau ua kev cai raus dej kom txhua txhia txoj kev ncaj ncees tiav tau. Nws “mus thoob plaws qhov txhia qhov chaw thiab ua hauj lwm zoo” (Cov Tub Txib 10:38), tiam sis tseem muaj neeg ntxub Nws vim Nws tau ua tej ntawd. Nws tau taug tej kev hauv lub teb chaws Filitees, kho cov neeg mob, ua rau cov dig muag pom kev, thiab tsa cov neeg uas tuag lawm sawv rov los. Nws tau qhia tej kev tseeb txog lub sij hawm nyob mus ib txhis, qhia tias peb lub qub neej zoo li cas, qhia tias lub ntsiab ntawm lub neej no yog dab tsi, thiab qhia tias Vajtsvw cov tub thiab cov ntxhais yuav tau dab tsi hauv lub neej tom ntej no.

Nws tau ua lub cim nco txog kom peb nco txog Nws txoj kev theej txhoj uas zoo kawg nkaus. Nws raug kaw thiab raug txim rau tej yam Nws tsis tau ua, tau raug liam txim kom ib pab neeg siab phem thiab txaus siab, thiab Nws tau raug tua tuag ntawm ib tug ntoo khaub lig saum lub roob Khaub Khaum Taub Hau. Nws muab Nws txoj sia theej noob neej tag nrho tej kev txog kev txhaum. Nws lub txiaj ntsim zoo kawg nkaus no yog kom pab txhua tus neeg uas yuav nyob hauv ntiaj teb.

Peb ua tim khawv tias Nws lub neej, uas tseem ceeb rau kev suav xyoo hauv ntiaj teb, tsis tau pib hauv lub nroog Npelehees los sis tsis tau kaw saum lub roob Khaub Khaum Taub Hau. Nws yog Leej Txiv Thawj Tug Yug, Vajtsvw Tib Leeg Tub, thiab lub ntiaj teb tus Cawm Seej.

Nws tau sawv hauv lub qhov ntxa los kom ua thawj tug uas sawv hauv qhov tuag rov qab los (saib 1 Kaulithaus 15:20). Tom qab tus Tswv tau sawv rov los, Nws tau mus xyuas cov uas Nws hlub hauv Nws lub neej. Nws kuj mus xyuas Nws “lwm pab yaj” (Yauhas 10:16) hauv teb chaws Amelikas thaum ub. Hauv lub caij nyoog kawg no, Nws thiab Nws Leej Txiv tau mus xyuas tus tub hluas Yaucej Xamiv, kom pib lub caij uas muaj txhij txhua (saib Efexaus 1:10) uas tau cog lus tseg lawm.

Tus Yaj Saub Yaucej Xamiv tau hais txog tus Khetos uas Muaj Txoj Sia Nyob hais tias Nws ob lub qhov muag ci ci li nplaim hluav taws; Nws cov plaub hau yog xim dawb li daus xib daus npu; Nws lub ntsej muag ci ntsa iab tshaj li lub hnuv; thiab Nws lub suab nrov nrov li cov dej hlob tsaws ntxhee, twb yog Yehauvas lub suab, uas hais tias:

Nws yog tus thawj thiab tus kawg, hais tias Nws muaj sia nyob, hais tias Nws tau raug tua tuag, thiab hais tias Nws yog peb tus pab mus hais Leej Txiv (saib Q&K 100:3–4).

Tus Yaj Saub kuj tau hais tias tom qab tau hais txhua zaj lus tim khawv txog tus Cawm Seej lawm, nws tau hais zaj lus tim khawv kawg no hais tias: Tus Cawm Seej muaj txoj sia nyob tiag!

Vim tus Yaj Saub tau pom Nws ntawm Vajtsvw sab tes xis thiab tau hnov ib lub suab hais lus tim khawv tias Nws yog Leej Txiv Tib Leeg Tub—

Hais tias los ntawm Nws, thiab dhau ntawm Nws, thiab vim muaj Nws, cov ntuj yeej muaj lawm thiab raug tsim lawm, thiab cov uas nyob hauv tej ntuj ntawd twb yog Vajtsvw cov tub thiab cov ntxhais (saib Q&K 76:22–24).

Peb muaj lub siab mos siab muag tshaj tawm hais tias Nws lub pov thawj hwj thiab Nws lub Koom Txoos muaj rov qab los nyob hauv ntiaj teb no lawm—los ua rau saum tej neej . . . uas yog cov thwj tim thiab cov yaj saub, Yexus Khetos kiag yog tus ncej tas (saib Efexaus 2:20).

Peb ua tim khawv tias yuav muaj ib hnuv twg uas Nws yuav rov qab los nyob hauv ntiaj teb. “Thaum ntawd tus Tswv yuav nthuav nws lub hwj chim ci ntsa iab rau neeg ntiaj teb txhua tus tau pom” (Yaxayas 40:5). Nws yog tus vaj ntxwv uas kav tag nrho tej vaj ntxwv thiab tus Tswv uas kav tag nrho tej tswv, thiab txhua lub hauv caug yuav tsum tau txhos thiab txhua tus nplaij yuav tau pe hawm tab meeg Nws. Peb txhua tus yuav sawv ntawm Nws lub xub ntiag los raug txiav txim raws li peb tej hauj lwm thiab raws li peb lub siab tej kev xav.

Peb ua Nws cov Thwj Tim uas tau raug tsa li kev cai hais lus tim khawv—tias Yexus yog tus Khetos uas muaj txoj sia nyob, Vajtsvw Leej Tub uas tsis txawj tuag. Nws yog tus Vaj Ntxwv Emanu-es zoo, uas niaj hnuv sawv ntawm Nws Leej Txiv sab tes xis. Nws yog qhov kaj, yog txoj sia, thiab kev cia siab rau lub ntiaj teb. Nws txoj kev yeej yog txoj kev uas coj peb mus rau txoj kev zoo siab hauv lub neej no thiab rau txoj sia nyob mus ib txhis hauv lub ntuj tom ntej no. Peb ua Vajtsvw tsaug rau Nws lub txiaj ntsim zoo tshaj plaws uas yog Nws Leej Tub.

THAWJ PAWG THAWJ TSWJ HWM

PAWG KAUM OB TUG THWJ TIM

James Robinson
Thomas M. Morgan
James H. Smith

Boyd K. Parker
J. Brown
David B. Haight
Neal A. Maxwell
Russell M. Nelson
Dallin H. Oaks

M. Russell Ballard
Joseph B. Wirthlin
Richard G. Scott
Scott D. Hall
Jeffrey R. Holland
Henry A. Eyring

YEXUS KHETOS

LUB KOOM TXOOS

NTAWM TSOOM

HAIV NEEG NTSEEG

HAUV HNUB NYOOG KAWG

